

Յարգելի սգակիր բարեկամներ,

Բոլորիս սուգը մեծ է եւ ցաւը խորունկ, երբ այսօր եկած ենք յարգանքի մեր վերջին տուրքը մատուցելու ՀԲԸՄիութեան սիրուած եւ կարկառուն անդամներէն մէկուն անժամանակ մահուան համար:

Կարելի չէ խօսքերով նկարագրել եւ սպառել անհատականութիւնը տոքթ. Վիգէն Ճիզմէճեանի, անձ մը, որուն ներկայութիւնը կը լեցնէր գաղութին կեանքը, միութենական թէ մարզական ասպարէզներու մէջ:

Մանկութենէն, հակառակ իր հանդարտաբարոյ նկարագրին, եռանդուն եղած է միշտ եւ փայլուն, ոչ միայն դպրոցական եւ համալսարանական ուսման, այլ նաեւ միութենական կեանքին մէջ:

Պատասխանատուութեան գիտակցութիւնը զինք առաջնորդած է իր անսակարկ նուիրումը բերելու Հայկական Բարեգործական Ընդհանուր Միութեան աշխատանքներուն, երբ տասը երկար տարիներ օժանդակած է անոր աշխատանքներուն, առանց պաշտօնական որեւէ պիտակի, որմէ ետք անմիջապէս Գահիրէի մասնաճիւղին ատենապետ կարգուած է, իր համակարգուած մտածողութեան եւ աշխատանքին համար:

Նախակրթական ուսումը Հելիոպոլսոյ Նուպարեան Ազգային վարժարանին մէջ ստանալէ ետք, յաճախած է Յիսուսեան երկրորդականը եւ վկայուած Գահիրէի Քասր Էլ Էյնի համալսարանէն, որպէս ատամնաբոյժ-վիրաբոյժ:

Եղած է հաղորդակցութեանց տնօրէն եւ պաշտօնական բանբեր ֆութպոլի Ափրիկեան ֆետերասիոնին, անդրամ ՖԻՖԱյի աշխարհի մրցումները կազմակերպող յանձնախումբին, եղած է տեղեկատուութեանց պատասխանատու աշխարհի ախոյեանութեան մրցումներուն, պաշտօնական լրատու եւ ծրագրումի տնօրէն ափրիկեան ֆութպոլի ախոյեանութեան, Եգիպոս, անդամ ՖԻՖայի լրատուութեան յանձնախումբին, անդամ Եգիպոսի ֆութպոլի միութեան գործադիր յանձնաժողովին, ՖԻՖայի լրատուութեան պատասխանատու աշխարհի

ախոյեանութեան մրցգաշարքին, Գանատա, ՖԻՖԱյի պատուիրակ ֆութպոլի միջազգային մրցումներուն, ծրագրումի տնօրէն ՖԻՖԱյի աշխարհի ախոյեանութեասն երիտասարդաց մրցումներուն, Եգիպտոս:

Եգիպտահայ համայնքէն ներս ունեցած է ծաւալուն գործունէութիւն՝

Եղած է անդամ Գահիրէի ՀԲԸՄի Կռունկ երգչախումբին, օժանդակ անդամ Գահիրէի ՀՄԸՄ-ՆՈՒՊԱԸի երիտասարդաց վարչութեան, խմբապետ ՀՄԸՄ-ՆՈՒՊԱԸի սկաուտական շարժումին, անդամ, ապա ատենապետ Գահիրէի ՀՄԸՄ-ՆՈՒՊԱԸի երիտասարդաց յամձմախումբին, անդամ Գահիրէի Սուրբ Գրիգոր Լուսաւորիչ եկեղեցւոյ հոգաբարձութեան, վարչութեան անդամ Գահիրէի ՀՄԸՄ-ՆՈՒՊԱԸ մարզական ակումբին, անդամ Գահիրէի Թեմական Ժողովին, օժանդակ անդամ Գահիրէի ՀԲԸՄի վարչութեան,

Խմբագիր Եգիպտոսի ՀԲԸՄի կայքէջին, խմբագրական խորհրդատու ՀԲԸՄի «Տեղեկատու» հանդէսին, անդամ ՀԲԸՄի Եգիպտոսի Շրջանակային Յանձնաժողովին, ապա՝ փոխ-ատենապետ եւ մինչեւ օրս՝ ատենապետ ՀԲԸՄի Գահիրէի մասնաժողովին:

Տակաւին այնքան բան ունէր տալիք իր եռանդէն եւ աշխատանքէն եգիպտահայ գաղութին թէ իր ծննդավայր երկրին՝ Եգիպտոսի: Նման հարուստ կեանքի մը այսպէս բրտօրէն դադարումը մեզ խորունկ ցաւով կը լեցնէ, ինչպէս եւ կ'ափսոսանք մեր համայնքի գալիք սերունդներուն, որոնք ա՛լ առիթը պիտի չունենան հանդիպելու տոքթոր Վիգէն Ճիզմէճեանին, ծանօթանալու իրեն եւ վայելելու իր մարդկային մեծարժէք յատկութիւնները:

ՀԲԸՄի Շրջանակային Յանձնաժողովին եւ Գահիրէի Մասնաճիւղին անունով Աստուծոյ մխիթարութիւնը կը հայցենք իր մօր, տիկնոջ, դուստրերուն, ընտանիքին բոլոր անդամներուն, ինչպէս եւ մեր համայնքի իւրաքանչիւր զակին համար:

Լոյսերու մէջ հանգչի իր գեղեցիկ հոգին:

